



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

**Rara nungi jenbua alitsü asoshi
NATO nung züngsemtsüla: Zelenskyy**

**Venus Williams Indian
Wells masayatsü**



VOL. XXII ISSUE NO. 132 (ADOK 132) DIMAPUR SANGTENNÜ (TUESDAY) TSÜKLAI (FEBRUARY) 25, 2025 ₹ 5.00

PM Modi-i anogo ananü atema Assam semdang

Guwahati, February 24, 2025 (Agencies): Prime Minister Narendra Modi-i anogo ananü atema Assam semdangdang dancers aser drummers 9,000 jungnua Jhumoir dance performance ia pa agizükogo.

Jhumoir Binandini sentong ya Himanta Biswa Sarma-i aniba sorkari ayongzük aser External Affairs Minister S. Jaishankar den linük 60 nungi ketdangsürtem aden.

Assam nung tea industry küm 200 ajungba tenüng nung iba benjung ayongzuka among aser süngolu ayimer kintem indang sobaliba senmang sayuogo.

PM Modi-i o jembidang Assam-i süngo den tesentaktep takang aliba aser pa süngo ayoker ama inyakba bilemteta jembi.

"Chaiwala ka dak alaka shibai süngo indang teronem aser jenjang tajungba angatettsü" ta Modi-i ashi.

"Alima tesem balala nungi ambassadors 60 temai Assam metettsü aser parnoki süngo teronem meyipa bener aotsü" ta

PM Modi-isa ashi.

Iba benjung amongba sülen PM Modi-i Khanapara, Guwahati nung 'Advantage Assam 2.0 Infrastructure and Investment Summit' nung gallery tasen ana lapoktsü.

Iba gallery ana ya 'Pride of Assam' aser 'Future of Assam' ta jaloktsür aser state nung traditional industries den modern infrastructure aser industrial developments indang sayur.

PM Modi-isa 2023 küm Assam semdangdang tsüngsanger 11,000 temai Bihu dance asüba atema world record ka yangluba bilemteta ashi.

Centre sorkari India kübok tesem balala nung "adivasi museums" lapoktsü meranger aser süngolu nung mapa inyakertem aser talisa tetsürtem taa tajungba agütsütsü meranger ta PM Modi-isa ashi.

"Süngolu nung mashisa tetsür lakh 1.5 nem senotsü teyari agütsütsü. Assam sorkari Ayushman Arogya Mandirs 350 lapoker" ta paisa ashi.

Ao Senden-i Mariani-Mokokchung lenmang yangluba semdang

Dimapur, February 24, 2025 (TYO): Ao Senden den külemi Ao Lanur Telongjem aser Mokokchung Town Lanur Telongjem züngsemtemi February 24, 2025 nü Mokokchung-Mariani (Assam) sendaktepba lenmang semdangogo.

Parnok den külemi Ongpangkong Block EAC, Dobashis, Mangkolemba Sub-division SDO, National Highways, Mokokchung Division Executive Enginner Er. Limatoshi aser contractor Ghunavi Aye 'M/S Affluent Enterprises & Services' nunger dena liasü.

Mariani-Mokokchung lenmang dang National Highway 702 D ajar aser Mokokchung district nung alirtem atema tongtipang lenmang rongnung ka lir. Ajisüaka, kümtem süia arudang iba lenmang kanga

mejungi akümba agi Mokokchung aser meketa aliba district temi timtem aika ajangshia arur.

Ao Senden teloki tanü Changki yimtsüng nung anenzükdang Changki Village Council-i parnok pelashishia agizük aser National Highway 702 D indang tebilemba lemsatepa liasü.

Iba lenmang nung 'drainage' system tajung yanglutsüla ta Changki Village Council-i ashi.

Iba mapatong ya March 14 tashi nung renemtsü anungji nisung ajaki yaritepdaktsünür ta PWD (National Highway) Mokokchung Division-i metetdaksüogo.

"Iba lenmang dak sendakba maparen ajak mapang shitak nung renema inyaktsüla kechiyong tzüngluruwa mapang mapa inyakba nung tetsükdaktsü ajurutsü" ta Ao Senden Vice

President Tinukaba-i contractor aser sorkar ketdangsürtem den jembidang ashi.

Paisa drainage system majungba atema temulung masüba ashiba den bangdak contractor dang Highway nung mongpu ajak nung senzusenbongtettsüsa yanglutsü metetdaksü.

Contractor Ghunavi Aye-ia lenmang renema yanglutsü nangzük. Iba mapatong nung Phase 1 aser 2 tembangba sülen Guwahati nungi osang anguba sülen Phase 3 nung 'soiling' tenzüksü ta paisa ashi.

Ao Senden-i aniba telok nungsa Truckers Union züngsemtem densema liasü aser parnokia drainage system atema tebilemtsü lemsatep/

Contractor Aye-isa March 14, 2025 tashi dang süaka contract mapang atsülanger tesem ajak nung mapa inyaktsü ta nangzük.

Foothill Road atema NFHRCC ya 'Third Party' masü saka kibur lir

Dimapur, February 24, 2025 (TYO): Nagaland Commissioner & Secretary PWD (Works & Housing)-i Foothill Road ya sorkari senotsü ajunga agüja inyakba mapatong ka anungji 'Third Party' agreement nüngdak mali ta ashiba Nagaland Foothill Road Coordination Committee (NFHRCC)-i jangjashitsüogo.

Foothills Road Project kibur ya NFHRCC (Hohos/Naga Public) lir aser bangdak department ya nodal agent lir. Külén Contractor tem ya contract mapa inyaktsü lemozüksürtem lir anungji iba mapatong atema committee/kibur dang Third Party ajatsü makok, ta NFHRCC-i ashi.

Commissioner & Secretary (Works & Housing)-i Foothill Road ya tanga mapatongtem den kasa ama mezüngoktsüla kechiyong iba ya mapatong khenyongi balaka lir. Foothills Road ya extraordinary Project ka ta mapang shia committee-i shia arur anungji tanga mapatongtem den kasa mezüngshitsüla ta parnokisa ashi.

Ali kiburtemi sen poisa ka danga magii ali agütsür, Naga Political Groups-i tax magir aser iba mapatong nung ali inch ka danga malir Chang, Sangtam, Yimkhiung aser Khamniungan nungeria iba mapatong nung shilem agir. Iba mapatong ya tongti Kin Hohotem temoatsü kübok Naga public lennirtemi shisatetba aser tenzükba mapa ka lir aser Prayer & Fasting tongshi nung ajemdaker tenzük, iba yongji dang Foothills Road dang Extra-Ordinary Project ta ajar, ta

NFHRCC-i metetdaksü.

Governor's Camp nung M/S Pukato & Sons ajanga Doyang Bridge yangluzükba sülen Committee dang apu lapoktsü atema osang metetdaksü aser ibaji department dangi aben. Ajisüaka kanga dang taoktsatsüka Chief Minister ketdangsüba kübok Niathu Resort nungi Doyang Bridge lapoktsü aser iba osang Committee nem mesangoktsü.

Nagaland Legislative Assembly-i September 22, 2022 nü Foothills Road ya NEC ajanga yanglutsü bangjemtep saka sorkar tasen akümba sülen aiben mepishiaka Foothills Road indang mejembi. Iba jagi Committee-i Nagaland Governor den ajurutepa mapatong indang osang tejangja lemsatep aser pai angateta Union Minister dangi shidi ka zülutsü. Iba shidi den külemi MP Phangnon-i züluba shidi bener December 17, 2023 nü Union Minister den ajurutepa senden ka amen. Idangji pai Foothills Project atema akokba tashi yaritsü nangzük aser iba ajanga SASCI (Special Assistance to State for Capital Investment) kübok dendaktsü, ta NFHRCC-i ashi.

December 14, 2024 nü PWD (R & B) department-i SASCI kübok Phase 1 atema Rs. 148.5 crore alang work orders 17 agütsü. (1). M/S Medodi Construction & Co. (2). M/S N. Chisho Swu & Sons (3 work orders) (3). M/S T. Albert Angami & Co. (4). M/S P. Mha-Tum & Co. (5). M/S Quinker

Enterprises (6). M/S 3S Infra (7). M/S. Yanna Enterprises. (8). M/ S. A. Pongshi Phom & Sons. (9). M/S. Shangpoh Konyak. (10). M/S. Onkho Construction & Supplier. (11). M/S. Ren Kik-E.Z.J & Co. (12). M/S. JK Construction (2 work orders) aser (13). M/S. Chabou & Co. (14). M/S Pelle Kheize & Co nunger nem work orders agütsü.

Foothills Road mapa shitak aser tashishitsü melii inyaktsü atema tetenzük nungi beshia aruba ama Committee-i contractor ajak dang Agreement ka nung sign sütep jaok saka (1). M/S. Yanna Enterprises. (2). M/ S. A. Pongshi Phom & Sons. (3). M/S. Shangpoh Konyak. (4). M/ S. Onkho Construction & Supplier. (5). M/S. Ren Kik-E.Z.J & Co. (6). M/S. JK Constructions (2 work orders) aser (7). M/S. Chabou & Co. nungeri Committee den Agreement agiteptsü memulung. Iba ken o angatetteptsü atema January 16, 2025 nü committee-i Ao Senden, Lotha Hoho aser Sumi Hoho den külem senden ka amen aser M/S. Ren Kik-E.Z.J & Co., M/S. JK Constructions, M/S. Chabou & Co. nunger dang January 20, 2025 tashi nung Agreement nung sign asütsü ayongzuka liasü.

Maneni, January 19, 2025 nü Committee-isa Phom People Council (PPC) den senden ka amen aser M/S. A. Pongshi Phom & Sons dang January 23, 2025 tashi nung Agreement nung sign asütsü mepishi. Ano, January 23, 2025 nü Konyak Union (KU) den senden amen

aser M/S. Yanna Enterprises, M/ S. Shangpoh Konyak, M/S. Onkho Construction & Supplier nungeri sign asütsüba Agreement KU ket nung agütsü.

January 20, 2025 nü M/S JK Construction aser M/S Chabou & Co-i committee ket nungi Agreement meshi saka January 26 tashi nung magütsü. Anungji M/S JK Construction kibur Dr. John den ajurutepa Agreement nung sign asütsü indang nenshi aser idangji pai par jabaso den jembitsü ashi saka pa dang nungi telangzüba kecha mangu. Iba jagi Ao Senden, Lotha Hoho aser Sumi Hoho-i February 4, 2025 nü JK Construction, M/S Chabou & Co, M/S Ren Kik-E.Z.J & Co. nunger jaoka senden amen saka Dr. John-i senden nung medeni oadok anungji pa ama shisashir kati iba ama inyakba ngua Lotha Hoho nem anogo 5 tsünga parnok telongtet nung work orders ngua aliba contractor tem den jembiteptsü mapang züngzüksü, ta NFHRCC-isa metetdaksü.

Iba sülen PWD (R & B) Minister-i February 7, 2025 nü Kin Hoho 12 prong jaok aser anogo asem-pezü ka tsünga Contractor aser Committee den ajurutepa ken o angatetteptsü nangzük ajisüaka tanü tashi department-i senden mayonger ta parnokisa ashi.

February 20, 2025 nü Kin Hoho 12 aser Dimapur nung amenoka aliba kin Hoho tem den Committee-i Agreement nung sign masüba contractor tem mapa inyaka moudaktsütsü bangjemtep. Ajisüaka February

21, 2025 nü MLA Achumbemo Kikon lenisüba kübok department den asüngdangya kecha mesü dang M/S JK Construction aser M/S Chabou & Co nungeri Baghty Division nung mapa tenzük. Iba inyakyim ya Kin Hoho 12, bangdak department aser NFHRCC mezüngmeshia inyakba lir.

Iba inyakyim ajanga Nagaland sorkar ya Democratic inyakyim asü mesüra nisung kati yimsüsüba inyakyim nung aoer ratar. Nagaland State nung terenlok mapatong aika inyakyim lateta yur inyaker saka mapatong kar dang tembanga inyakteter aser tanüngbatemji senotsü peria ngua tembanga meinyaker. Iba yongji NFHRCC-i anibelem arema iba otsüsütsü aketba mapatong kümzüksü meranga arur.

August 2023 nung NFHRCC-i Department/ Contractors aser Committee tsünga Tripartite Agreement agiteptsü atema bangdak department dang mepishia liasü saka department-i Committee dang contractor tem den ang bilateral Agreement agitep junger ta ashi. 2013 nungi iba mapatong tenzük arudang Contractors den Agreement agitepa arur aser iba ya tanga kecha atema masü saka mapa junga inyaktsü, tashishitsü malitsü aser mapang shitak nung tembangtsü atema lir. Anungji Extraordinary Foothills Road mapatong asoshi kibur- NFHRCC (Hohos/Naga Public) dang Third Party ta majatsüla ta parnoki jangjashitsüogo.

Kohima nung Financial Literacy Week tenzükogo



Hombarnü Hotel Vivor, Kohima nung Nagaland asoshi RBI Financial Literacy Week 2025 tenzükdang tangokba noksa ka nung General Manager & Officer-in-Charge, Paresh Chauhan den ketdangsürtem angur.

Dimapur, Tsüklai/February 24 (TYO): Reserve Bank of India indang Nagaland atema Financial Literacy Week 2025 sentong Hotel Vivor, Kohima nung General Manager & Officer-in-Charge, Paresh Chauhan-i February 24, 2025 nü tenzükja liasü.

Iba sentong nung Makuni Thaimei, AGM, State Bank of India, Kohima; Velayutham S, Chairman, Nagaland Rural Bank; Nengneithem Hengna, Director, Project Runway India HM Pvt. Ltd.; Meriema, Tsiesema Bawe aser Tsiesema Basaand Thizama nungi SHG Members (NSRLM); NSRLM nungi teshimtet nisungtem, bank aser CFLs balala nungi dena liasü.

Omen tejangja yanglur nünsüng yongsük shilem ka dak

tenük yoker Reserve Bank of India ajanga 2016 nungi Financial Literacy Week (FLW) ya küm shia ayongzükja arur.

Financial Literacy Week 2025 ya February 24-28, 2025 anogotem alitsü aser ibai taküm agi küm ter buba alitsü.

Financial Literacy Week ayongzükba nükjidong ya nüburtem dang senotsü dak sendakba nung awareness prokshitsü asoshi lir. Financial literacy ajanga kija aser kibong nung senotsü junga ketdang asütsü, tarutsü asoshi sentong yanglutsü aser senotsü amshiba nung telemtetba tajung agitsü asoshi sayur aser shisa agütsür.

Tensa melenshia aruba ama financial literacy kanga nüngdaka kumogo aser senotsü tsütsü telemtetba agiba, lendong timtem mesüra tajangzük indang

iba sentong ajanga angateter.

India ajunga atema Financial Literacy Week 2025 ya Mumbai nung Hombarnü RBI Governor Sanjay Malhotra-i semzüksü. Taküm iba sentong indang omen ya 'Financial Literacy: Women's Prosperity' alitsü.

Lokti nung tetsür temi shilem balala agiba mechi tetsür nem temulung agüja financial literacy ya angazükdaksütsü nükjidong nung lir. Iba campaign nung timtem aliba, kumdanga senotsü apuba, credit score junga ayuba, kilung atema budget junga yangluba amala onüktem awajemtsü.

Iba mapang Reserve Bank of India-i bank aser danga stakeholders den lungjemer linük tesem ajunga nung awareness sentong ayongzüksü.

NPF-i Sekrenyi benjong salem abener

Dimapur, Tsüklai/February 24 (TYO): Naga People's Front (NPF) tenüng nung Angami nunger dangi Sekrenyi benjong salem abener, ta NPF tir Apong Pongener-i sangdong ka ajanga ashi.

Sekrenyi ya sobaliba tsütsü tongtipang mapang ka lir, kong telungjem, asendenshiba sayur. Nenok lungjemer iba tongtipang benjong amungdang, ner

sobaliba tajung nung tashi aliba tali angatetsü imlar.

Sekrenyi ajanga Angami nunger ajunga dangi tesunep, yimchiyimjung aser tepela temoatsü arudakjang aser tarutsü putu ajungmesoa sobaliba tajung temaba jenjangi ajungketangma.

NPF tenüng nung nenok ajak dang tepela Sekrenyi benjong salem abener, ta sangdong ajangasa ashi.

GST TDS & TCC indang training ayonger

Dimapur, Tsüklai/Fenruary 24 (TYO): Commissioner of State Taxes, Nagaland, Abhinav Shivam, IAS ajanga sangdong ka nung, Kohima nung amenoka aliba Government Department aser Registered Contractors indang DDOs/Tax Deductors atema GST TDS (Tax Deducted at Source) & TCC (Tax Clearance

Certificate) training March 4, 2025 anepdang 10:00 ako nungi tenzükja Directorate of Treasuries & Accounts, Kohima indang Conference Hall nung agitsü, ta metetdaksüogo.

Anungji DDOs aser Registered Contractors ajunga dang iba training nung kata mezüdoki adentsü ayongzük, ta sangdong ajangasa ashi.



Mokokchung District Legal Service Authority ajanga February 24, 2025 nü awareness sentong ka ayongzükja liasü. Chief Judicial Magistrate & Secretary, Mokokchung District Legal Services Authority, Julian Sitlhou ajanga 'NALSA scheme for victims of trafficking and commercial sexual exploitation' indang jangja-jangja rateta ashi.

Niramaya Health Insurance Scheme kübok teyari agitettsü

Dimapur, Tsüklai/February 24 (TYO): Department of Health & Family Welfare ajanga sangdong ka nung, Autism, Cerebral Palsy, Mental Retardation aser Multiple Disabilities alirtem healthcare aser support services tajungba agitettsü nükjidong nung Ministry of Social Justice and Empowerment ajanga Niramaya Health Insurance Scheme semzükogo, koba

National Trust ajanga ketdang asütsü, ta ashi.

Niramaya scheme yagi temsüa alir küm shia hospitalization, therapy, corrective surgeries aser alternative medicines amala teyari sen lakh ka tashi indang agütsütsü.

Iba teyari agitsü atema National Trust nung tenüng zülüoktsüla. Registration mapang UDID Card aliba

Disability Certificate mesüra UDID Enrollment Number den PwD Certificate, Address Proof, Income Certificate (Poverty Line tema), Enrolment Fee Payment Proof nüngdaksü, ta sangdong ajanga ashi.

Enrolment aser application ya National Trust nung register süa aliba Registered Organization mashi kati inyaktetsü. State nung Registered Organizations yamai alitsü:

NGO Name	Address	Contact	Email
1. Care and Support Society	158, Block 4, Town Hall Road, Near DC's Office, Sangtemla Ward, Mokokchung-798601	943601761 1	careandsupportmokok@gmail.com
2. Cherry Blossoms Society	A16, Lerie Colony, LerieChazou near CRPF Camp, Kohima-797001	89740281 13	cherryblossomsociety@gmail.com
3. Jo Foundation	354, Agri Colony, Jo Foundation Inclusive School, Kohima-797001	9436000597	danieljofn@gmail.com

For more information, one may visit <https://nationaltrust.nic.in>

NSCN/GPRN-i Jt. Secy. Nikaho Kiba mapa nungi atsüngdoker

Dimapur, Tsüklai/February 24 (TYO): NSCN/GPRN ajanga Joint Secretary Nikaho Kiba, s/o Kiviho Kiba, Thilixu village tang nungi tenzükja linük tenzükba wadang nungi atsüngdoker, ta NSCN/GPRN (Niki) telok ajanga sangdong ka nung metetdaksü.

Central Secretariat nungi pa mapa nungi atsüngdokba indang totuyuba agütsüba nung, linük anema inyaksangshiba nung pai shilem agiba ajanga sorkar indang Azah nung aliba ama Nikaho ya mapa nungi atsüngdoker, ta shia lir.

Anungji tang nungi tenzükja kija, lokti, unions, business associations aser state sorkar ketdangsür shirisa pa den

amalitep lidir pei nija khuret asütsü aser NSCN/GPRN tenüng nung pai inyaksangshiba atema sorkar khuret kecha malitsü, ta ashi.

Maneni temang majungba ajanga NSCN/GPRN-i Joint Secretary Kitoka Zhimo nem linük tenzükba mapa nungi anisüngzük agütsür, ta kasa sangdong ajanga ashi.

NSCN/GPRN ajanga mapa nungi anisüngzük agütsüsang ketdangsüri Naga nunger nüchiso angutsü timtem balala arema tenzükba atema pelaba lemsateper aser tarutsü nung pa asoshi takokba lidakjang ta moatsür, ta NSCN/GPRN (Niki) indang sangdong ajangasa ashi.

Nisung pezü nem DGAR Commendation Card agütsü



Dimapur, Tsüklai/February 24 (TYO): Headquarters Inspector General Assam Rifles (North) nung sentong ka agidang lokti tejakleni aotsü asoshi shilem tajung agiba atema tenügsang agüja Lt Gen Vikas Lakhera, AVSM, SM,

Director General Assam Rifles (DGAR) ajanga nisung pezü nem Director General Assam Rifles Commendation Card agüja liasü.

Iba sempet ya K N Sekhose, Imna Yaden, Kenei Ritse aser Neiketuno Sechu nunger nem

agüja liasü.

Director General Assam Rifle Commendation Card ya apet-asong makaba temaitsü lir aser pei wadang nung bendanga agütsür dangar dak nungi alia inyakba nisungtem nem agütsür.

Parnok takok asoshi tetushi agütsüba ajanga dangar tema nüburtem asoshi mapa tajung inyaksü merangtsü ajungmesor.

Iba sentong nung jembidang Lt Gen Vikas Lakhera, AVSM, SM ajanga sempet angur nem tenügsang agüja liasü aser

yimjung, terenlok aser tejakleni aotsü atema civil society aser security forces tsüngta amalitep akatsü tongtipang ta ashi.

Tarutsü tia ajungtsü mechi nüburtem den lungjemer inyaksü temulungtetba nung Assam Rifles lir ta pai nenshia ashi.

Vijender Delhi nung Speaker shim



February 24, 2025 nü Delhi assembly nung Vijender Gupta (tiyong) Speaker shimba sülen pa den Chief Minister Rekha Gupta (ajichi) aser Delhi Assembly nung opposition lenir, Atishi (abelen) nunger tangokba noksa nung angur.

New Delhi, February 24

(Agencies): Hombarnü 8buba Delhi Assembly nung Rohini nungi BJP MLA, Vijender Gupta Delhi Legislative Assembly nung Speaker shim.

Vijender Gupta ya taoba mapang Delhi Assembly nung Leader of Opposition (LoP) liasü.

Hombarnü Assembly Speaker atema Delhi Chief Minister Rekha Gupta-i Vijender tenüng benokba sülen pa speaker shim.

Delhi sorkar tasen tentetba sülen mezüngbuba assembly senden nung BJP MLA Arvinder Singh Lovely-i Protem Speaker tenangzükba agia liasü. Delhi Lieutenant Governor VK Saxena-i ketdangsüa pa nem tenangzükba agidaksü. Iba sülen Vijender Gupta Speaker shim.

Teti benshia aruba ama CM Rekha Gupta aser Delhi Assembly nung opposition lenir,

Atishi nati Chair tashi pa meina ao.

Tesülen Shalimar Bagh nungi BJP MLA Rekha Gupta-i tenangzükba agi.

Lai X ajanga, "Ni Delhi atema nendaka inyaksü nangzükür! Tanü Delhi Assembly nung ni MLA tenangzükba agiogo. Shalimar Bagh ya ni mapa inyakdak tesem, saka Delhi nung senso ajakji ozü kibong. State terenlok aser nüburtem tenzüksü atema ni nendaka inyaksü. Ato kilonser @narendramodi mangdang ajanga ajungmesoa ni maneni Delhi terenlok atema inyaksü," ta metetdaksü.

Ano külen Delhi Minister Parvesh Verma-i, tang sorkar tasenbai Delhi nung nüburtem taginüba ataloktsütsü aser election atema nüboyimba mapang nangzükba ajak ataloktsütsü, ta metetdaksü.

Paisa, "Ni Opposition party nungia amalitep aginer. Delhi-i

ano temaba jenjang atongtsü atema ozüing tajung nüngdaker. Onoki Delhi ya Paris mesüra London ama kümdaktsütsü ta menangzükür, ajisüaka Delhi nung terenlok alitsü atema onoki inyaksü. Iba ya ozü sorkar bangzüng lir," ta metetdaksü.

Modi-i aluyimer cr. 9.8 nem sen crore 22,000 agütsü

Patna, Tsüklai/February 24 (Agencies): Hombarnü Ato kilonser Narendra Modi-i linük nung aluyimer crore 9.8 nem PM Kisan Samman Nidhi scheme kübok instalment 19buba nungi sen crore 22,000 agütsüogo.

Ato kilonseria Bihar nung terenlok projects aika semzüksüogo.

Bhagalpur nung agiba sentong nungji Modi den Bihar Chief Minister Nitish Kumar, Union minister tem, MP tem, state MLA tem aser ketdangsertem aika liasü.

Anepdang osangbenertem den jembidang Ato kilonser Modi-i, India nung aluyimertem ajanga sorkar nüma atanger; sorkari aluyimertem taküm jenjang tajungba akümtsü atema inyaksü, ta metetdaksü.

PM KISAN kübok sen

crore 22,000 ji Direct Benefit Transfer ajanga aluyimertem indang bank accounts nung indangindanga inoktsü.

Ato kilonseri, Bihar nung aluyimertem kibong lakh 75 shi PM KISAN scheme ajanga tajangzük angur, aser tanü Bihar nung aluyimertem indang bank accounts nung sen crore 1,600 inoktsüogo, ta metetdaksü.

Modi-i, "Viksit Bharat indang tongshi pezü lir, aser itemji sensakertem, aluyimertem, lanurtem aser tetsürtem lir," ta metetdaksü.

Paisa, "Central sorkar süaka state sorkar süaka aluyimertem jenjang tajungba kümdaktsütsüji tongtibangtiba lir. Tesüiba küm 10 tsüngda aluyimertem tebilemtsü ajak bentettsütsü atema onoki meranga inyakogo," ta metetdaksü.

US nungi meindokba India nunger 12 Delhi tonga aruogo



February 23, 2025 nü Panama nungi India nungertem Delhi airport tonga arudang tangokba noksa nung angur.

New Delhi, February 24

(Agencies): Tim masüba lenmang ajanga US-i oa alir India nunger 12 US nungi meindokba sülen Amongnü parnok Delhi tonga aruogo, ta ketdangsertemi metetdaksü.

Parnok tayimtsü ajanga Panama nungi India tonga aru.

February 5 nü mezüng US sepaitem tayimtsü ka ajanga India nunger 104 meindoka liasü; parnok anir aruba tayimtsüji Amritsar nung

anenzüka liasü.

February 15 aonunga US sepaitem indang tayimtsü ka ajanga US nung ozüing alema oa alir India nunger 116 anir aruja Amritsar airport atong. US nungi meindokba India nungertemji Punjab nungi parnok 65 liasü, Haryana nungi 33, Gujarat nungi 8, Uttar Pradesh, Goa, Maharashtra aser Rajasthan nungi anana aser Himachal Pradesh aser Jammu & Kashmir nungi kaka liasü.

CELEBRATING STORIES • INSPIRING MINDS

28.02.25
01.03.25

THE HERITAGE,
OLD DC BUNGALOW
KOHIMA, NAGALAND

SCAN FOR LOCATION

Film Screenings
Masterclasses
Festival Bazaar

EVENT MANAGED BY:
LIV NOW



TIR YIMYIM YIMOBILEM (EDITORIAL)

DIMAPUR SANGTENNÜ, FEBRUARY (TSÜKLAI) 25, 2025

Viksit Bharat

- Tangsen Lemtur

Yakümba nungi tenzüka Prime Minister Narendra Modi-i anir Union Minister temi kanga bulua jembia aruba oren kaji 'Viksit Bharat' lir. Viksit Bharat tetezü 'Terenlok India' lir. 1947 küm India nung nuchiso anguba sülen 2047 nung küm 100 ajungtsü, anungji nuchiso ngur küm 100 ajungba küm tashi nungjibo India ya terenlok linük ka akümtsü nükjidong yur sorkari asalentong balala benoka inyakdar. Iba mangdang yur sorkari budget-a renemer. India nung nuchiso anguba sülen taküm 78 abensatsü, ajisüaka tesüiba küm 77 tsüngda India nung sensak tia tamajungba dang akümba ya tebilemtsü onük tuluka lir. India nung takartembo takarba dang akümer saka sensakertembo tesensakba dang akümer. India nung rongsen shilem 77 bo nütsüng shilem 10 ket nung lir; iba report ajanga takar ishika ket nung linük rongsen shilem tulubaka aliba kuli jangjar. Iba dak sendakba nung Oxfam India campaign ajanga sorkar dang nüburtem taküm jenjang tajungba akümtsü atema sen teimba indoktsü aser takartem dang nungi saru tali agitsü ajungshir. Sorkari 2047 küm tashi nungbo 'Terenlok India' nükjidong ataloktsü mangdang yur inyakbaji junger, ajisüaka iba mangdang yur inyakba denji külemi 2047 küm tashi nungjibo nütsüng million aika 'sensak tia' aser 'aya-tzüra' tia nungi anitetsü atema-a mangdang yur inyaktsüla. Asenokibo aikati kangasa sensaka aliba jenjangji majangshidang saka linük nung nütsüng aika kanga sensak tia nung lir. Tamalen Supreme Court judge bench kati, India nung terenlok liaka sensaker aikati aonung ayaba memetetsü atema tzü dang jemer tebok nung sü agi nangri kanger mejangba metetdaksüogo. Tamalen UNICEF report ka ajanga ashiba agi, India nung anogo shia nisung crore 20 bo aonung bokzüng mejanger. India nung nuchiso ngur küm 100 ajungtsü atema rangloker jajaba kümtemji 'Amrit Kaal' asütsü ta sorkar sangdonger inyangshia arudar. 'Amrit Kaal' tetezü sensotem taküm jenjang tajungba kümdaktsütsü, yimtsüng aser jila tsüngda terenlok tsütsü liromedemtsü, nüburtem libaliro nung sorkari kangabo mamoshitsü aser technology tajungtiba asütsü. India nung nuchiso ngur küm 100 ajungdangbo India nung aya-tzüra agi asürtem melira ibajisa takok tulutiba asütsü. Global Hunger Index 2024 nung linük 127 nungi India jenjang 105buba nung ang lir. UN Food & Agriculture Organization-i, India nung million 189 bo (nütsüng shilem 14) bok agi matu, ta metetdaksüogo ajisüaka iba dang nungjagi teimba alitsüa akok. India yimtsüngtem nung nütsüng shilem 70 shibo aluyimba nung metaloka lir, anungji sensak tia agientsü atema yimtenren lenirtemi jila/yimtitem terenlok atema rangloker inyakba dang nungibo yimtsüngtem aser aluyimba sector nung taliba rangloker inyaktsüla ta mongintemibo ashir. UN-i yawara tetezü yamai rateter- chiyungtsü makaba agi anogo shia nisung 10,000 shia nungi tain anana mesüra tanur pezübo yaseta asüba aser tanur asem shia nungi kabo bok agi matu kongraba tensaji yawara lir. Ajioda India nungbo yawara meliaka anogo shia nisung 7,000 yaseta asür (UNICEF Report). UN Sustainable Development Goals-i 2030 küm tashi nungbo alima nung aya-tzüra malitsü nükjidong yur inyaker; yamaji India-ia 'Viksit Bharat' nükjidong yur inyakba denji külemi linük sasep nung aya-tzüra malitsü nükjidong yur inyaktsüla.

OLEMSABANG

TAMANGER TAJUNG KATI KODA ARTIFICIAL INTELLIGENCE ANGATETTSÜ

~ Akok Amer, Pastor: Impur Baptist Arogo

AI ya kechi?

Meimchir shisatsü menepa nüburtem tongzüka mapa ajak inyaktetba machine yangluba talisa computer system ajanga achaayanger iba dang ya Artificial Intelligence ta ajar. Artificial Intelligence ajanga angazükba, mapa tasak ajak rasa agütsütetba (problem solving), decision making aser iba machine nung aliba procedure (technical term AI algorithm) ajanga data base analysis ajak mapang meindoki kera kera telangzüba (accurate) agütsütetter. Ajisaka, iba machines tem dak meimchir dak aketba atangji (realistic) mulungsentsü nungi nungteta adokba, nungmesoba (emotions) dang maket,

Alima kera ainba postmodernism putu ka nung Artificial Intelligenceajanga kanga melenshidaktsür aser aseni maa sümonga nungpoka asen atep ajaki aita lir. Asüng asen chirnur meta-modernism putu nung koda lia aotsü, ibai tang yongi shisatoktena mita atatsüji kanga tongtibang. Tanü asen lokti tentet maparen aser arogotem ajak nung AI ajanga tajangzük aser lentongtem külemi asenoki ajangshitsü. Tekümdangtsütem aser tamanger ka ama asen tamang nük kümdanga mitta atatsü asoshi iba onük tongmelang agi lemsateper.

AI technology ajanga asen temang anepalutsüyim (medical diagnosis), financial management, ki mapatem, factory mapatem, kaket rijutem nung kaketnang(library) den tajungba agütsütetter (e-library/e-books), officitem nung e-fillingmesüra cloud storage balala teperi agütsütetter aser tajungtiba kümaaotsü.

AI ajanga mapatem metitemi konda tasazük kecha mali inyaka dang alitsü, koba ajanga meimchir tashi aser mapang kümzüksü. Ajisaka, meimchir libaliroyim (ethics) tsütsü nungi tasüngdangba kaji, iba AI ajanga nisung ka jurila ayak (private identity), jurila data security mesüra personal decision making nung koda privacy maintain asütsü. Kechiyong meimchir shia asenok nem jurila temeten (to protect the identity and rights of individuals) agütsüa lir, iba AI ajanga temeten shitak agütsüteti ma?

AI putu nung alir asüdang tanü na social media nung medemer aika yimteta alitsü akok saka tejak o tejak na chitepa ajurutsüpur, sensaksemtsüpur (human interaction) tembar mali. Lokti meimba aser lokti sententem sama aoer, kidanger kechi ataloker memetet, *emoji* ajanga asen expressions sayutsü saka mulungbena oa ariabilemtsür ajema akümba ajangshir. Asüng lokti lenirtem, iba machinestemi asen lenirtem melentsüasü? Kaket rijutem nung tesayurtem iba machinestemi melentsüasü? Arogo nung sannükertem iba machinestemi melentsüasü?

Tamanger tajung ka ama shisadangtsü kaji, iba machinestemi hau! asen mapa tem ajak inyaktsütsü aser 24/7 item yagi institution tem ajak nung inyaktsü. Sorkar mapatem nung süaka na tata posting tesemi na tonga moakasa, AI robot ka toktsü nung iba jagi ne mapa ajak inyaktsü. Na driver mekakasa tanübo automatic sensor driverless karitem atokdaki. Süra, meimchir libaliroyim (social ethics) ajanga ashibaji, meimchir o meimchir na tesendaktep mela-mela sama aotsü ana nung lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ministry aikati kaketshir million 250 atema sarasademsütsü



2023 küm February 23 nü Statesboro nung aliba Georgia Southern University nung 'Collegiate Day of Prayer' anogomong nung kaketshirtem sarasademdang tangokba noksa nung angur.

February 24, 2025: February 27, 2025 nü Collegiate Day of Prayer anogomong nung Arogotem aser ministries aikati alima tesem ajaklen college/universities nung azünger kaketshir million 250 atema sarasademsütsü.

Küm shia agiba sentong ya tan ita tatembangbuba Brihostibarnü agitsü aser iba anogomong nung nisung 700 den Arogotemi college campus 1,100 dak tema nung kaketshirtem atema sarasademsütsü.

Collegiate Day of Prayer (CDP) Executive Director, Thai Lam-i, CDP-i iba sentong ya 2009 küm tenzüka liasü aser iba anogomong nung colleges aser universities nung sarasadem sentong agir; aso 19buba tetenzüklen-a iba ama sentong

ya agia aruogo, ta metetdaksü. "1823 küm tashi nungbo denomination ajak aser college campus ajak nung February ita tatembangbuba Brihostibarnü iba anogomong nung college campus tem nung sarasadema aru. Iba ya 1815 küm nungi World War I tashi liasü. Iba mapang nungji alima nung temelenshi liasü, rara liasü, Spanish flu liasü aser timtem aika liasü," ta Lam-i metetdaksü.

"Tanü-a iba ama ya among nung koma? ta onoki apiteta liasü. Anungji onoki iba sentong agitsü atema ayongmeso. Mezüngbuba küm nung onoki campus 450 nung agi aser tanabuba küm nungbo campus 900 nung agi," ta pai metetdaksü.

Iba anogomong amongtsü

atema apitetsang Lam-i, "America nunger puti otsü nung iba ya sarasadamba anogomong tejentiba lir. 2009 küm nungi tenzüka iba sentong ya tuluba dang atemzüka monga arudar," ta metetdaksü.

2023 küm February ita nung Collegiate Day of Prayer atongtsü mapang anasa Wilmore, Kentucky nung aliba Asbury University nung tekülem sentong agidang tanela asentenshi milak ka jangru aser anogo 16 tashi tekülem agia liasü.

CDP ayongzükertemi Asbury campus nung alirtem den ayongteper campus sentong melenshia liasü. Collegiate Day of Prayer nung Asbury University revival milak jangruba sülen nungi Lam-i iba anogomong nung alima nung

college azüngertem dak rangloker iba sentong ayongzüka agir.

2023 küm Collegiate Day of Prayer anogomong nung nisung million 5-i shilem agia liasü, aser iba nungjagi shilem 50 shibo US adener alima tesem balala nungi liasü.

"Onoki US nung aliba college campus 4,200 nung kaketshir million 20 dak rangloker iba sentong agir aser tanga linüktem nungja million 2-i shilem agi," ta Lam-i metetdaksü.

"Asbury nung revival milak jangruba sülen takümbo onoki alima tesem ajaklen Collegiate Day of Prayer ayongzüker. Onoki US nung kaketshir million 20 dang aliba nungi linük 195 nung kaketshir million 250 atema sarasademsütsü," ta pai metetdaksü.

Lam-i, "College campus ajak nung telok tilala lemsar tanela asentenshi nung rangloksü imlar. College campus shia nung Arogo ka, asem mesüra pongui sarasademsü nungbo koma süla? Arrshi küm 40 aser 60 purtemi parnok anasa aliba college campus atema sarasademsütsü apitet nungbo koma süla? Züngsem noklang ka aliba Arogoi campus ka atema sarasademsütsü melungtet nungbo koma süla? Yamaji asü nungbo Tsüngremi kechi

inyaktsüar asenoki shingaia memetet," ta ashi.

Collegiate Day of Prayer atema sarasademsütsü melungtetba ministry rongnung Cru densema lir. Cru ya 1951 küm University of California, Los Angeles nung ghonda 24 sarasadamba mapang tentetba kaketshir telok ka lir.

Cru mission expansion executive director, Dan Allan-i, Cru organization-i küm shia iba anogomong nung shilem agir, kechiyong iba telok tentetba mapang nungi onok mission tiyongtsüji sarasadem liasü, ta metetdaksü.

"Onoki kaketshirtem aser tesayurtem atema sarasademsüba ya Collegiate Day of Prayer mangdang den kasa lir. Onoki tanga ministries den senteper lanurtem atema sarasademsütsü maongka anguba atema pelar aser Tsüngremi tesem ajaklen college campus nung taküm aika melenshitsütsü ta amanger," ta Allan-i metetdaksü.

Allan-isa, "Taküm Cru-i ajak dang sarasadem nung campus asemsem bilemtettsü ayongzükogo; peii meimba campus ka, ki anasa aliba campus ka aser tanga linük nung aliba campus ka atema sarasademjang ta onoki ayongzüker," ta metetdaksü.

Pakistan linük nung Khristan lanur ka bail nung chioktsü

Lahore (Pakistan), February 24 (Agencies): Pakistan nung Tsüngrem mezüngmeshiba ozüng kübok tai tonglokja arrshi küm 18 Khristan lanur ka tesüiba ita 17 tashi jail nung puoka lir, ajisüaka taruba hopta pa bail nung chioktsü.

Tsüngrem mezüngmeshiba ozüng kübok Khristan, Akash Karamat anema ken o asem benoka liasü. Yaküm December 19 nü ken o ka nung pa nem bail agütsü aser taoba hopta tanüngba ken o ana nungji pa nem bail agütsüogo.

Tanabuba ken o nung February 18 nü pa nem tezüluba nung bail agütsü aser tanüngba ken o ka nung taruba hopta pa nem tezüluba nung bail agütsütsü imlar, ta Karamat atema ken o jembitsür, Asad Jamal-i metetdaksü.

February 13, 2025 nü Lahore High Court nung Justice Asjad Javed Ghural-i 2023 küm August 20 nü Karamat anema benoka aliba ken o nung pa nem bail agütsü.

February 19 nü High Court Justice Shehram Sarwar-i 2023 küm August 25 nü Karamat anema benoka aliba ken o nung pa nem bail agütsüogo.

Arrla 295-B nung ajemdaker Karamat nem tai



Akash Karamat

tonglokja liasü. Iba Arrla ya Muslim nunger temeshi kaket Quran raksatsüba dak sendakba ozüng lir. Ano Arrla 295-A ya yimsü amangertem kar melung yirutsüba dak sendakba ozüng lir.

2023 küm August 27 nü Karamat jail nung puoka liasü.

Yaküm December 19 nü Lahore High Court Justice Muhammad Waheed Khan-i 2023 küm July 16 nü Karamat anema benokba ken o ka nung pa nem bail agüja liasü.

2023 küm Punjab province kübok Sargodha district nung Satellite Town police-i Karamat anema ken o benokba sülen July 16, 2023 nü police-i pa pua liasü. Iba sülen-a pa anema police station balala nung ken o ana benoka

liasü.

Tang tesüsa pa anema ken o angadangba mapang nung judge-i, "Iba tatalokba mapang nungji pa (Karamat) tanur dang liasü (arrshi küm 18 majung), ajisüaka pa tepuokdak puokba sülen küm ka ser tesadang jungogo. Iba dak alia Police-ia court nem challan magütsü," ta metetdakja liasü.

Judge jagisa, ken o tatembang ka dangi marur aser Karamat mapang tataktet makai tepuokdak ayutsü makok, ta metetdakja liasü.

"Ken o menoa metembangtetba ya tai tonglokja alisang ajanga masü, anungji Criminal Procedure Code (CrPC) nung Arrla 497 kübok pa nem bail agütsütsü temsüa lir, ta court-i obendang agütsü," ta Jamal-i metetdaksü.

Jamal-isa, "Par kibong ya kanga sensaker; iba dak alia par kinüngertem-a tetsübu nung atsüka lir. Kodang Karamat jail nungi chioka par kibong den longjemdir parnok nem security agütsütsüla," ta metetdaksü.

Alima nung Khristantem alitsü atema linük tamajungtiba 50 rongnung Pakistan ya jenjang 8buba nung lir (Open Doors' 2025 World Watch List).

ANOGO ABEN TSÜNGREM DEN

OCHI NUNG TERA YANGANG

"Pa dak tera yanga aser metenloktepa aser nenok dang sayuba ama tamang nung akangdakja tenüngsang agi moshia liang"

~ Kolosi 2:7

Tera ayangtsüji temela mapa ka masü; kechi nung südir süaka tera ayangtsü asoshi yangji masetshi-i menaloker mapang talangka alinungang teraji junga yangtettsü.

Yisuji ochi (Yohan 14:14) asenoki ochi nung tera ayangtsü asoshi asen taküm Khrista nung metenloker alinungang asenoki shitakba ochi nungji tera junga yangtettsü.

Tanü asenok kanga dang kara aienba den külemi kanga dang temeyoktep lima ka nung asen taküm anogo shia jajar. Tanü asenok iba putu nung Khrista nung junga tera yanga melira asenoki asüng ayatai tia ajururtsü ana nung dang lir. Khrista nung tera yanga anogo shia jajatsü mapaji temela masü kechiyong Khristar lenmangji temesü aser ochi lir. Yamaji ochi lenmangji teti nung tasak lemanj lir. Saka shiri ochi lenmang shimer parnoki taküm lenmang shimer. Tanü asenok koma ka aliyonga tatem nungbo ochi agi obendang agütsütsü. Anungji Ochi nung tera yanga jajaba amangbapur ka ka südi.

AO OSHI ANGAZÜKDAK:**TANÜ ANGAZÜKTSÜBA OJANG****Tekapu**

(n) tekanük (palm)

* Ni an nem tekapu ka masüng jang agütsü.

Tekara

(adj) yakta jajaba aser inyakba (fast)

* Tekara nisungi alizüng tama atonger.

OLONG PAITEP # 7074

	1				2			3		4
5								6		
7			8							
								9		
		10								
11										12
					13					
					14					
15										

TIPIEN

1. Balaka	- (5)	2. Hai sür inyak	- (4)
6. Aika shirangba	- (4)	3. Aortenüng ka	- (6)
7. Tar tatsü	- (6)	4. Ali telungi talangka lur	- (5)
9. Nenü'er jabaso	- (4)	5. Tebang keniyongi mazüoker	- (4)
10. Sen latettsüba	- (7)	8. Ken atema anenzükertem	- (5)
11. Tangar kübok alir	- (4)	9. Toktepa noktak	- (5)
14. Lon nung inokba	- (6)	10. Sen	- (6)
15. Tzü ayimdak	- (4)	11. Benjong agi	- (5)
16. Ajok	- (5)	12. Telung nung rizünga ayu	- (4)
		13. Tebang nung enok	- (4)

LANGTSÜNGLEN**OLONG PAITEP # 7073 TELANGZÜBA****TIPIEN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket,
14. Mangu, 15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

NAI-A YA METETTER MA

Dr. JC Chaudhry-i Largest Trident aser Most Viewed Statue Ceremony atema Guinness World Records ana yanglutetogo. Dr. JC Chaudhry ya numerologist, educationist, aser philanthropist ka lir aser Vrindavan, Uttar Pradesh nung otsü tasen yangluteta liasü. Guinness World Records adjudicator Swapnil Dangarika-i Dr Chaudhry nem kulikakettem agüja liasü.

1. Largest Trident in the World - Iba nüngshilung ya feet 187 talang lir.

2. Most Viewed Statue Consecration Ceremony- Iba sentong ya USA, UK, Finland, Germany, Canada, Middle East, aser India dena linük aika nungi devotees 10,561-i repranga liasü.

Manipur sorkari kaketshir tepsetertem 'wanted' metetdaksür

Imphal, February 24, 2025 (Poireinganba, 31) aser (Agencies): Manipur nung Thangjam Thounghamba Meitei class VII kaketshir Laishram (26) na aputsü bushir ta Malemnganba tepsetba dak Manipur police-i sendakba nung nisung ana bushiba metetdaksüogo.

Laishram Malemnganba indang tasü mang ya February 10 nü par ki anasa angu aser Manipur sorkari Hombarnü pa tepsetba unng shilem agir nisung ana 'wanted' ta metetdaksüogo.

Imphal East district kübok Sagolmang nung alir Huiningsubam Yumlingba

police-i metetdaksüogo. Kija mesüra kibong kari danga tena jenokdaksüra ozüng tapet kübok temerenshi alitsü. Maneni tenati tekaratiba nung bangdakpur ket nung agütsütsü metetdaksür ta Manipur Police-isa ashi.

Class VII nung azünger Laishram Malemnganba (15) tepsetba dak sendakba nung police-i gari ka anguba sülen

kulitem bushitetogo.

Pambei-i aniba United National Liberation Front (UNLF) ajanga Huiningsubam Yumlingba (Poireinganba) ya parnok toktsür aoba züngsem ka ta metetdaksüba sülen police-i kuli jangjateta liasü.

UNLF-P ya tang sorkar den ceasefire nung lir aser taoba züngsem Yumlingba den nisung aseme Laishram Malemnganba tepset ta sangoktsü. Ajisüaka, police-i nisung ana dang 'wanted' metetdaksüogo.

Laishram Malemnganba ya Moirangkampu nung liasü aser February 10 nü par ki anasa nisung pezüi khaset. Iba tatalokba anema nisungtemi lungkak aityonga arur.

Police-i tekaratiba nung nisungtem tepsetertem aputsü ta nangzüka sülen Malemnganba tepsetba anema tentetba Joint Action Committee (JAC)-i JNIMS hospital nungi pa tasü mang agizükogo.

VPP-i Khasi tribal council nungi NPP atsüngdokogo

Shillong, February 24, 2025 (Agencies): Meghalaya nung opposition Voice of the People's Party (VPP)-i ochimashi anema inyakyonga arur aser Hombarnü Khasi Hills Autonomous District Council (KHADC) nung parnoki National People's Party (NPP) atsüngdokogo.

Maneni, Jaintia Hills Autonomous District Council (JHADC) nunga menden teimtiba angurtem rongnung VPP jenjang tanabuba nung lir. Taoba hopta tribal councils indang election agia liasü aser Hombarnü results

metetdaksüogo. KHADC nung Ardent Basaiawmoit-i aniba VPP ajanga menden 29 nungi 17 nung takok angu. Parnok sülen United Democratic Party-i menden 5, NPP-i 4 aser Hill State People's Democratic Party-i ka nung takok nguogo. KHADC nungsa Independent anati takok angu.

JHADC nunga VPP-i menden 29 nungi 8 nung takok angu aser council nung second-largest party kümogo.

JHADC nung NPP-i menden 13 nung takok ngutetogo. Maneni, UDP aser

Congress-ia menden asemsem nung aser Independent anati takok nguteta liasü.

NPP den yariteper BJP-i council anaprong nung menden ka nung danga takok mengutet. KHADC nung parnoki menden 17 aser JHADC nung 14 nung toktepa liasü.

Külen, Congress-i KHADC nung menden ka nung danga takok mangu aser iba ya tang mezüngbuba lir.

JHADC nung vote enoktsür lakh 3 tema nungi 70% aer KHADC nung lakh 9.9 jungnüa nungi 60%-i election nung shilem agia liasü.

GOVERNMENT OF NAGALAND**OFFICE OF THE COMMISSIONER OF STATE TAXES****NAGALAND: DIMAPUR.****NO. CT/ESTT/74/2022****Dated Dimapur the th February, 2025****ADVERTISEMENT**

In pursuance to the approval conveyed by the Government of Nagaland vide letter No.FIN/REV-18/ESTT/2012 (Pt)/116 dated 18/11/2024, applications are hereby invited for filling up the post of MTS (Group-D), District Pay Level-1(15500-49400) under the Department of State Taxes.

Sl No	Name of the Post	Number of Vacancy	Place of Posting	Remarks
1.	MTS	2	Dimapur	Indigenous inhabitant of Nagaland.
		1	Wokha	Indigenous inhabitant of Wokha District.

TERMS AND CONDITIONS:

- Educational Qualification: -The minimum educational qualification will be Class-VIII passed.
- Age: As on 01.01.2025
Minimum - 18. Maximum - 32.
Note:Relaxation of upper age for SC/ST Candidates and Government Employees shall be as per Government Office Memorandum.
- Reservation of quota shall be as per Government Office Memorandum.
- Documents Required: -
a) Educational qualification certificate.
b) Birth Certificate.
c) Indigenous Inhabitant /Scheduled Tribe/ Backward Tribe Certificate
d) NOC from HOD for Government employees(in original)
e) 2 Nos of recent passport size photos
- An amount of Rs 200/- shall be charged as application/Exam fee.
- Incomplete documents or application received after closing date shall be summarily rejected.
- Eligible Candidates shall be shortlisted on the Notice board of the Directorate of State Taxes Departments website, www.nagalandtax.nic.in on 5th April, 2025.
- The Department will notify the date of Interview in due course of time.
- Application form shall be issued from the Office of the Commissioner of State Taxes, Nagaland w.e.f.27th February, 2025 or can be downloaded from the Departments website. www.nagalandtax.nic.
- Last date for submission of Application form will be 15th March, 2025 till 4:00 pm.

Sd/-

(ABHINAV SHIVAM)IAS
Commissioner of State Taxes
Nagaland: Dimapur.

Rara nungi jenbua alitsü asoshi

NATO nung züingsemtsüla: Zelenskyy

Kyiv, Tsüklai/February 24 (Agencies): Linük anema rara nungi jenbua alitsü asoshi tajungtiba, tongmelangtiba aser mapa kuma inyaka aotsüji NATO ya dang lir, ta Ukraine Tir Volodymyr Zelenskyy-i ashi. Pai Kyiv ya Western military alliance nung adentsü asoshi tir menden yutsütsü renema lir ta sangdonger mapang tatsüka lir iba o ya jembia liasü.

US Tir Donald Trump-i Zelenskyy ya election magi akumba dictator ka lir ta ashiba sülen pa United States den tesendaktep mejungi lir aser pai NATO nung Ukraine züingsem akumba ajanga linük dangi yimjung arutsü asünungbo mapa yutsütsü renema lir ta Deobarnü ashi.

"Ukraine ya NATO nung medenra, asenoki Ukraine telungzük nung NATO tentettsüla, tetetzü tashiyim amshirtem meindoktsüsa tashi tait army anepalutsüla, item nem senotsü agütsütsü, nok-nü peria yanglua rizünga ayutsüla aser Russia-i ano rara tenzükba nungi nokdangtsü asoshi shilem agitsü atema tembar linüktem den jembishinütsüla," ta Zelenskyy-i social media X nung ashi.

Russia aser Vladimir Putin-i Kyiv anema tashiyim amshiba soittsü asoshi security guarantees tajung nüngdaker, ta Ukraine leniri ashi. "Asenoki talangba, tajungba aser tekeraba nung inyaktetba nüngdaker," ta pai ashi.

Zelenskyy-i nüngdak dang süra tangsa tir menden yutsütsü

ta ashi aser Trump dang pa indang jenjang angateta Kyiv sasa Russia-i amakba nungi kumzükba ayuba nung yaritsü security guarantees tejangja bener arutsü ayongzük.

Ali rongsen atema United States den tezüngzüktep yanglutsü atema inyakba nung terenlok lir ta pai ashi, kechiaser United States-i rara mapang Kyiv yariba temelen amai US-i Ukraine indang 'rare minerals' sen \$500 billion tajangzük aginer.

Ali rongsen agitetsü asoshi US-i taoba mapang draft agreement ka yangluba Zelenskyy-i magizük, kechiaser yangji security guarantees mali aser jenjang sen \$500 billion liasü. Ukraine nem teyari agütsüba ya sentsüh amai züingshia meyipa agütsütsü asünungbo "Pandora's box" amai asütsü aser Kyiv-i par yarir ajunga nem parnoki yariba meyipa agütsütsüsa akumtsü ta pai ashir.

Kasa mapang Russia-i Ukraine amak tenzükür küm asem ajungba mapang telungjem temaitsü sayua European Union aser Canada nungi lenirtem Ukraine nung adenshi.

Hombarnü Ukraine Tir Volodymyr Zelenskyy-i European Commission Tir Ursula von der Leyen aser Canada Ato Kilonser Justin Trudeau nungeri anir ketdangsürtem agizükba mapang par linük-i meranga raraba tushia liasü. Ajisüaka United States nungi lenir kata maru.

"Küm asem tashiyim anema nokdakba. Küm asem

tenüingsang agütsüba. Ukraine nunger küm asem tasü ita nokdakba. Shirnokisa nokdakogo aser yariogo, nenok ajak dang pelaba lemsateper," ta Zelenskyy-i ashi.

"Takum alitsü asoshi iba rara nung, ibai Ukraine nunger tia kisüing lendong nung lir masü. Ibai Europe tia lir," ta European Commission Tir Ursula von der Leyen-i social media post ka nung ashi.

US-i yariba azüngtsütsü amokmerena liaka züingsem 27 aliba bloc indang lenirtem March 6 nü senden ka mena Ukraine aser European defence atema telemtetba agitsü.

Hombarnü EU foreign minister tem senden ka amendang Russia anema tenokdangba packages 16 buba agizükogo ta angazükür.

Ajisüaka Hungary lenir Viktor Orban, shiba Russia Tir Vladimir Putin den tesendaktep tajung lir aser EU-i Ukraine yaritsü merangba tanen makai benjadaktsür, paibo joko tenokdangba agütsütsü memulungtsü ta ashi.

Foreign Minister Peter Szijjarto-ia Ukraine nem EU ajanga military aid agütsütsü jembiba nung par linüki memulungtsü ta ashi.

Ukraine dang Russia den yimjung tezüngzüktep ka yanglutsü asoshi US Tir Donald Trump-i ajungmesoba ajanga Budapest nung senden ya amener.

US ketdangsür temi taoba hopta Russian ketdangsürtem ajurua liasü aser Trump o Zelenskyy na media ajanga o tamajung shitepa rara ya Kyiv-i tenzük ta US leniri tai tongloktür.

MULUNG NEN O



ASO: 26.11.1939

ASÜ: 19.02.2025

CHUBATEMSHI

Onoki teti aküm agüja aser meima aliba obala asür **Chubatemshi G.B Longsa**, ajungbena akümli tembangba mapang, temeimer kija aser lokti balala ana aser talang nungi shirnokisa asüku lemsatepba den sarasadem, nübu, rongsen aser shisa tajung agi onok mulung süngzükja yaritepogo, nenok ajak dang tsüingdong arua pelaba meshitet nung iba sabang ajanga pelaba lemsateper. Nenok temeim mapa tulu asoshi onoki kecha lepa magütsüteter saka asen takar Tsungremi nenok ajak talubusa moatsütsü onok tamang sarasadem.

Temeim kinungtsü, chirnur, anükabang, semchir & kinungtertem

MULUNG NEN O



Late Litemkokla Ozükum (Süingratsü)
(10.06.1941 - 18.02.2025)

Ozü mulung zürep tia nung alidang, ana aser talang nungi kija-kibong, kiyong-kidanger, arogo aser lokti tentet balala ajanga ozü asüku nung sarasadem, temeim mapa aser teyaritep tulu agüja onok mulung sünepdaktsü nung nenok ajak dang kanga pelaba lemsateper. Nenok mapa tajung maneni asen teyanglur Tsüingremi moajangma ta ozü sarasadem.

Temeim kinungbo, chirnur, semchirtem aser anuk-apang.

ALI TAYOKTSÜ LIR

1. OLD SHOWUBA AREA KHEHOKHU VILLAGE @170 Per sqft.
2. NEAR FOOTHILL ROAD 4 MINUTES DRIVE FROM HIGHWAY.
- @ 42 Per Sqft. (Any size available) Contact : 9863826159

Japan aser Philippines na military tesendaktep yanglushir

Manila, Tsüklai/February 24 (Agencies): Japan aser Philippines nati military tesendaktep akangshitsü mulungtepogo. Parnok meketa China-i tashiyim tali amshia aoba mapang ka nung tang linük ana yagi iba tesendaktep asoshi mulungtepogo.

Japanese Defence Minister Gen Nakatani aser Philippine Defence Secretary Gilberto Teodoro, Jr nati Hombarnü ashiba agi, parnoki linük ana military tsüingda "strategic dialogue" ka aser defence equipment aser technology tsütsü tesendaktep asoshi "high-level framework" amenoktsü mulungtepogo.

Anogo ana atema Philippines semdangba tembangba mapang Nakatani-i ashiba agi, pa aser Teodoro nati parnok meketa aliba tesem t a m e n d a k d a k manokshidaktsütsü aser yimjung nung toktsütsü atema tesendaktep yanglushitsü

nüngdakba lemsatepa tesendaktep asoshi mulungtepogo.

"Onok meketa security tesan tamajungba küma odar, aser strategic partners ama iba amala tia tensa ka nung Indo-Pacific nung yimjung aser tamendakdak manokshi-i toktsütsü asoshi defence tsütsü tesendaktep tali tajungba küma yanglushitsü nüngdaka kümogo ta onoki agizükogo," ta Nakatani-i osangbenertem dang ashi.

Hombarnü senden mamen tsüingda Teodoro-i ashiba agi, China aser tanga linüktemi international order aser otsü melenshitsü atema merangba linük anapronglai anemer.

Japan aser Philippines naprongla United States den defence treaties yanglua lir aser linük ana yagi China-i South China Sea aziöktsü merangba anema ola adoka arudar. Iba tziyiyim ya kanga tongtibang aser iba ajanga alima nung rong senziisenpong asemsü nung kabo senzür.

GOVERNMENT OF NAGALAND DIRECTORATE OF SCHOOL EDUCATION NAGALAND : KOHIMA

ADVERTISEMENT

Kohima Dated the th February 2025

No. ED/EST/GR-IV/SDEO-TSMYU/2022: In pursuance of Government directive vide No. DSE/APPT-MTS/TSE/19-9/2024 dated 27-01-2025, applications are hereby invited from indigenous inhabitants of Tseminyu District for 1(one) post of Peon/MTS in Pay Matrix Level-1 at Government High School, Sendenyuunder the Department of School Education.

TERMS & CONDITIONS:

1. Educational Qualification: Highest class read should be indicated along with all supporting documents i.e ST Certificate/Indigenous Certificate/Birth Certificate/ Aadhar/ 2 Nos. of recent passport photos.
2. Age limit: The candidates should not be less than 18 years or more than 37 years of age as on the date of publishing of this advertisement.
3. The application should be addressed to the Principal Director, Directorate of School Education, Kohima-797001
4. Last date of receipt of applications shall be **18th March 2025**
5. Applications with incomplete documents shall be summarily rejected
6. Admit Card shall be issued on **21st March 2025**
7. Interview shall be conducted on **26th March 2025**

(THAVASEELAN K) IAS
PRINCIPAL DIRECTOR

Chümoukedima-i U-16 asayamung kokogo



Dimapur, Tsüklai/February 24 (TYO): 2buba Boys U-16 Multi-Days Inter-District Tournament 2025 February 23 nü tembangogo. Taküm iba asayamung ya Chümoukedima District-i koka liasü.

Iba asayamung ya January 29 nü tenzük aser February 4 nü tashi asaya aser iba mapang district balala tsüngda kanga toktepa asayaba sülen final ya February 17 nungi 23 tashi asaya liasü.

District aika den kanga toktepaba asayaba sülen Chümoukedima District

nungi asayartemi parnok sempet aser sportsmanship tajung sayua iba asayamung kokogo. Taküm iba asayamung nung runners-up ji Mokokchung district liasü.

Iba asayamung ya lanur asayartemi parnok sempet sayutsü aser multi-day cricket asaya nung tajangshiba tajung angutsü atema sabang tajung ka liasü.

Asayamung nung jurila sempet angurtem:

Best Bowler: Aloto Sumi (Chümoukedima)

Best Batsman: Aloto Sumi (Chümoukedima)

Best Wicketkeeper: Shiva Kumar Yadav (Dimapur)

Player of the Tournament: Aloto Sumi (Chümoukedima)

Iba asayamung nung sempet tajung aketba lanur asayartemi aika jangjaogo aser state nung iba asaya renloka aotsü lenmang sadema lapoka aliba sayuogo.

Kasa mapang nung asayamung ayongertemi asayamung nung shilem agiba team tem, ketdangsürtem aser asayamung pusemer ajak dang kanga pelaba lemsatepogo.

BFI achaayangtsü atema IOA-i ad hoc committee ka tentettsü



New Delhi, Tsüklai/February 24 (Agencies): Boxing Federation of India (BFI) achaayangtsü atema Indian Olympic Association (IOA)-i ad hoc committee ka tentettsüogo. Federation yongtsü nung ketdangsüba nung mepetmesü adoker aliba ajanga iba jenjang agiogo.

BFI ketdangpurtem tenure ya February 2 nü tembangogo, saka election tang tashi agia mali. HT-i, ketdangsüba nung timtem aliba aser election menoa magiba indang osang agütsüogo.

"IOA-i Boxing Federation of India (BFI) indang administrative affairs kanga

kümdanga asadanga aruogo. Sorkar inyakyim nung IBF indang election ya February 2 nü mesüra iba masüdag agitsüla ta shia lir. Ajisüaka mapang atakzüksür liaka election magi aser iba ajanga federation ketdangsüba nung tetsükdaktsü adoka liasü," ta IOA tir PT Usha-i Hombarnü ashi.

BFI ketdangpurtem aikati election menoa magiba atema Usha dangi shiti züluogo. BFI unit 24-i election March 3 nü agitsü atema bangzüng yanglu ajisüaka election maig-i liasü.

"Ita tsüngda National/International asayamung tongtibang balala nung India nung boxer temi shilem

magiba indang ken o dak sendaka aliba ketdangsürtem, coach tem aser asayartemi densema stakeholder tem nungi office-i tashishiba agizükogo.

"Iba ya international jenjang nung Indian boxing terenlok aser performance atema tetsükdaktsü lir, koba tangsa tang bentettsü nüngdaker," ta Usha-i ashi.

Usha-isa, tensa apir Boxing Federation of India inyakyim achaayangtsü aser election magi tashi inyakyimtem ajak takok ngua benoka inyakyonga aotsü asoshi ad hoc Committee ka tentettsüogo, ta ashi.

Committee ya Madhukant Pathak tekolak ser inyaksangshitsü, aser züngsemtem rongnung Rajesh Bhandari, DP Bhatt, Shiva Thapa aser Virendra Singh Thakur nung densema lir.

Ad hoc panel yagi boxing community-i benokba tebilemstütem bentettsü merangtsü, taruba international asayamung nung asayartemi asayadaktsütsü atema jenjang agitsü aser BFI election takaratiba nung agitsü atema jenjang agitsü.

Moise mozüki nungi yokogo

Tsüklai/February 24, 2025 (Agencies): Fiorentina forward Moise Kean, Deobarnü Serie A asaya ka nung tekolak yirua gound nung laoba sülen mozüki dangi anir aoba yokogo, ta osang ajanga metetdaktsü.

Kean ya stretcher ka nung anir tugu aser iba sülen local mozüki kati anir oa liasü. Hellas Verona nung Fiorentina den asayaba mapang asaya tanabuba shilem nung iba ya ataloka liasü.

"Verona nung aonung ka mozükidang amungba sülen Moise Kean yokogo aser Florence-i meyipaago, ta Fiorentina-i jangjatsür. Tetendangba balala agiba ajak negative results dang ngua liasü," ta club-i Hombarnü sangdong ka ajanga metetdaktsü.

Kean ya asaya nung tejak tsüka neksemo shisaba anepaluba sülen meyipa ia

liasü. Ajisüaka pa ground telungi aiba sülen minute ishika dang lir laoatok. Italy nung asayar ya süjiabo mao.

Tang asaya aliba season nung tang agi tanabenbuba Fiorentina nung asayar ka ground telung nung laogo. December ita Edoardo Bove ground telung nung süjia aoba sülen tang Kean dak ataloka liasü. Bove ya medically induced coma ka nung ayu aser heart defibrillator ka implant süja liasü.

Kean pa indang career nung taküm tajungtiba asaya arudar aser pai tang tashi nung goal 15 idaktsür lir.

Iba asaya nung Verona-i goal 1-0 agi Fiorentina koka liasü. Mapang apuloktsür asayaba mapang minute pongububa nung Antoine Bernede-i Verona atema goal ka idakja parnoki asaya akok. Fiorentina pur taruba asaya Hokolbarnü Lecce den asayatsü.

Venus Indian Wells masayatsü



pela, kechiyong nüburtem kanga pelatepa liasü, anungji ni odang asayatsü asü ta bilema liasü," ta Williams-i Naestved yimti nung sentong ka nung shilem agiba mapang ashi.

"Ni iba asayamung nung masayatsü. Ni bendanglen alitsü," ta laisa shisem.

Iba sülen mapang tatsüka lir tournament director Tommy Haas-i, March 2 nungi 16 tashi Southern California nung asayatsü aliba asayamung nung Williams-i shilem magitsü, ta jangjatsüogo.

"Venus-i takümbo wild card magizük ta ozü team nem osang agütsüogo," ta pai ashi. "Venus takok ngua aotsü imlaja atar aser tarutsü nung la Indian Wells nung asayatsü imla atar," ta kasa sangdong ajangsa metetdaktsü.

2001 küm final nung Kim Clijsters akokba asaya nung fan temi Venus tenu Serena menütsüba sülen lai iba asayamung nung küm 15 tashi shilem magi-i liasü. Semifinal nung Venus aser tenu na asayatsü liasü saka lai yiruba ajanga masayatetsüsa akümbe sülen fan temi Serena menütsüba liasü.

"Ni Indian Wells meimer aser idakji oa asayaner saka ni jelia tanga sentong yangluatokogo," ta Williams-i shisem.

Tsüklai/February 25, 2025 (Agencies): Taoba mapang world number one asayar Venus Williams, taruba ita Indian Wells asayamung nung masayatsü. Iba WTA 1000 asayamung yagi arishi küm 44 tain asayar nem ya wild card agütsü saka lai magizük.

Williams shiba taoba season asayamung ana dang asaya liasü, lai Denmak nung sentong ka nung o jembiba mapang ashiba agi, Bodhbarnü masü tsüngda la nem wildcard agütsüba indang osang kecha mali. Laisa, la tanga sentong yanglur aliba ajanga iba asayamung nung masayatetsüsa kümogo.

"Iba osang angazüka ni ka

BILEMDANGANG

"Mapa takoktsü ajak memerangdangba ajanga makoker."